

Cartë nabëquë'e San Pablo lu Tito

Cartë nabëshe'ldë Pablo lu Tito

1 Na Pablo, nahia tubi muzë shtë Dios nu nahia muzë shtë Jesucristo parë guadi'dza lu ra nagulé Dios parë tsaldí ldu'u rai' más nu parë gac bè'a rai' shti'dzë më naná de acuerdë con tubi vidë santu. ²Ruadi'dza lu rai' purquë dzuléza'a guëquërdënú hia'a lë'ë më parë siempre. Dios bè'në prometer vidë eternë antsë cueshtë guédchiliu, nu Dios adë rguguédi'i'. ³Iurë bëga'a tiempë nabë'në Dios disponer, bëlua'a më voluntá shtë më por diza'quë shtë më; bëru'uhin lu llni lo quë nagunë më por diza'quë shtë më. Bë'në më incarguë guiahia diza'quë ni según mandadë shtë Dadë Dios, el quë nagunë salvar lë'ë hia'a. ⁴Quëquëa'a cartë rë' lu Tito; nal ziquë shinia purquë nápël mizme fe quë na. Rac shtua'a gunë ldai' më guëquël, nu guëga'a ldu'u më lé'ël, nu cuedchí ldú'ul por pudërë shtë Dios, Shtëda'a, nu por Cristo Jesús, Salvador shtë hia'a.

Dchi'ni nabë'në Tito regiuni Creta

⁵Na bëseana lé'ël dani la'ni nisëdu'u. Dani ni lë Creta; bëseana

lé'ël parë gúnël règlë grë lo quë narunë faltë, nu parë gúnël nombrar më gushë ziquë cabësë shtë iádu'u cadë guédchi catë nanú shmënë Dios. ⁶Gunibé'ahia lé'ël gulël ra nguii za'quë, ra ni tubi chu quëgní'idi'i guëc rai', nguii nanapë tubsë tsé'li', ra nguii ra shini rai' rialdí ldu'u rall Jesús, nu los de más mënë rni'i rall shini nguii ni mënë za'quë na rall, lédëdi'i shini nabani mal sin rëspëti. ⁷Pues el quë nanapë carguë shchi'ni Dios, nall muzë shtë Dios; napë quë gáqui' më za'quë, adë gáquëdi'i mënë mal, nilë adë gáquëdi'i nguii narldë nasesë lu sa'll, nilë tubi narzuu'dchi, nilë tubi narguili dishi'bi, nilë el quë narzebi ldu'u dumí, ⁸sino gáqui' nguii narunë recibir naze'dë lídchi', nu gáqui' tubi nguii narunë bien, nu quëhúnëll rëspëti derechë shtë sa'll, nu quëápëll mizme lé'ëll de grë maldá; gúnëll cumplir mandamientë shtë Dios, nu guëquitë ldú'ull grë shti'dzë më. ⁹Nguii ni napë quë tsaldí ldú'ull verdá shtë Dios con guëdubínú ldú'ull tal cumë ziquë bësédëll di'dzë ni tē parë gac guëluá'all diza'quë lu stubi mënë tē parë tsagla'guë tsanaldë rall shnezë Dios. Nu nguii naná encargadë con shchi'ni më, napë quë gáqui' tubi

narac ruadi'dzè bien lu ra enemigu shtë diza'què. ¹⁰Pues cantidá mënë mal rzu'bè diáguèdì'i rall shti'dzè mē; ruadi'dzè rall cusè tuntè; rsigué rall mënë con enseñansè shtë rall. Zihani mënë ni rianaldè tèchi ra custumbrè shtë nariuguè tubi partè delicadè shtë ra llguè'nè. ¹¹Rqui'ni guè'au rua' rall purquè rsigué rall hashtë grè ra naná tubi famili, tsaldí ldu'u rall enseñansè falsè naquèglua'a mënë ni sulè parè gunè rall gan dumí.

¹²Guc tubi mèsè mè Creta; guní'ill shcuendè mizmə mè ládzèll: "Ra mè cretense siembrè nabishi rall; na rall ziquè ma dushè; nalé rau sha'tè rall nu nabèchi rall". ¹³Verdá guní'i mënë ni. Por ni guní'inú lè'è rall tè parè guèabrí tsanaldè rall tèchi enseñansè shtë Cristo, ¹⁴nu parè adè gúnèdì'i rall cuendè grè ra di'dzè falsè shtë mè israelitè, nu adè gúnèdì'i rall cuendè ra mandadè shtë mënë narqué guia'a verdá shtë Dios.

¹⁵Grè ra nanapè llgabè limpi, grètè' ra cusè limpi nahin; perè parè lè'è ra nadè rialdídì'i ldu'i nu ra nanapè mal llgabè, parè lè'è rall grè cusè nádi'in limpi hashtë nilè shgabè rall nu la'ni ldu'u rall hia gullinin; ldu'u rall nu shgabè rall gadzé con duldè. ¹⁶Rni'i rall de què nané rall Dios, perè quèhunè rall negar lè'è mè por lo què narunè rall. Adè rèuu'di'i ldu'u Dios por lo què naquèhunè rall; nédì'i rall gunè rall cumplir shti'dzè mē; rllufí'di'i rall parè cusè za'què shtë Dios.

Ldai' za'què

2 Lé'èl Tito, bèlua'a lo què naná de acuerdè con ldai' za'què.

²Guni'i lu ra mè gushè, gac rai' seri

nu gapè rai' rēspēti nu gapè rai' el mizmə lē'è rai', nu gac shtu'u rai' sa' rai'; gac rai' mēnē narua'a ldu'u lu cusè durè nu gapè rai' pacēnci. ³Nu guni'i lu ra na'a gushè, lē'è què lē'è rai' gapè rai' vidè santu lu Dios; adè guadí'dzēdì'i rai' chismè, nu adè gáquēdì'i rai' mè narzuu'dchi, sino napè què guèlua'a rai' cusè za'què lu shfamíli'. ⁴Zni guèlua'a rai' los de más ra na'a lliguè tè parè gac shtu'u rai' tse'lè rai' nu gac shtu'u rai' shini rai'. ⁵Gac tubldí shcuendè rall nu gapè rall llgabè limpi. Gapè rall lidchi rall ziquè runè tucarè, nu guèzu'bè diaguè rall shti'dzè tsé'li' tè parè adè chu guēn'í'di'i mal cuntrè diza'què shtë Dios.

⁶Nu zac guni'i lu ra nguui lliguè, gac rall mè naquèrèldè bien lu sa' rall. ⁷Nu mizmə lé'èl gáquèl muestrè lu ra sa'l manèrè nanabánil. Gáquèl mèsè za'què parè lè'è rall; bèlua'a lè'è rall con rēspēti sin ni tubi bishi. ⁸Biadi'dzè lu rall de acuerdè con diza'què shtë Dios tè parè adè chu guēn'í'di'i na mal lo què naruadi'dzèl. Zni guètú lu ra narunè cuntrè ra di'dzè shtë Dios. Hia parè guēni'i rall mal de lè'è hia'a, adè gúnèdì'i rallin.

⁹Guni'i lu ra narunè sirvè lu lamè tè parè guèzu'bè diaguè rall shti'dzè shlamè rall, nu gac shtu'u rall lamè sin guēn'í'di'i rall cuntrè lè'è lamè. ¹⁰Adè cuánèdì'i rall, sino gac rall mè za'què lu lamè tè parè manèrè naquèrèldè rall guèlua'a de què ra enseñansè naze'dè de Dios nu Salvador shtë hia'a; nalé nasa'a nahin. ¹¹Pues lè'è favurè ru'bè nabè'nè Dios parè mēnē narēta' lu gué'dchiliu, hia bèdchinin tè

parë gac salvar grë clasë mënë.

¹²Quëglua'a më lë'ë hia'a de quë napë quë guësá'na'a nezë mal parë guëquërélda'a bien; quëglua'a më de quë napë quë gápa'a tubi vidë ldi, nu gápa'a vidë za'quë lu më, nu gápa'a mizmë lë'ë hia'a lu cusë mal.

¹³Mientras cuéza'a iurë lë'ë Dadë Jesús guëabrí stubi con pudërë nu llni; guëlua'alú më lu mënë stubi. Blac llëru'bë na pudërë shtë Dios nu Salvador shtë hia'a. ¹⁴Bë'në më intriegu mizmë lé'i' lu galguti parë quílli' duldë nu gúni' librar lë'ë hia'a lu duldë të parë guëzunë më ldu'u hia'a parë gáca'a limpi. Gulé më lë'ë hia'a parë mizmë lé'i' të parë guëquitë ldu'u hia'a.

¹⁵Bëlua'a grë di'dzë rë'. Tsagla'guë guni'inú ra mënë, nu bë'në corregir con pudërë nabëne'e Dios guiá'al. Gubani bien të parë adë chu gúnëdi'i desprëci shtí'dzël.

Lo quë narunë tucarë gunë ra shmënë Jesús

3 Guni'i stubi lu ra narialdí ldu'i diza'quë, napë quë guëzu'bë diagüë rall ra narnibë'a nu ra autoridá, nu gac rall dispuestë gunë rall cualquier cusë za'quë. ²Guni'i lu ra mënë, adë guëní'idi'i rall cusë mal cuntrë sa' rall nu adë guëní'idi'i rall chupë tsunë di'dzë, sino gac rall nadu'u; gac rall më humildë nu gapë rall pacënci lu grë mënë.

³Pues zac lë'ë hia'a antsë adë riasédi'i hia'a nu gubani hia'a lu ra cusë mal nu gúca'a mënë narac mañi lu sa' hia'a. Guc nambídia'a; rldënú hia'a cualquier mënë, nu bëldënú mënë lë'ë hia'a. Rna túsha'a lu sa' hia'a. ⁴Perë iurë

bëru'u lu llni lla rac shtu'u Dios lë'ë hia'a, nu blac naza'quë na më Salvador shtë hia'a, ⁵bë'në më salvar lë'ë hia'a, lédëdi'i purquë bédë'na'a cumplir mandamientë shtë më, sino purquë sulë bëga'a ldu'u më lë'ë hia'a; nu bëzunë më almë shtë hia'a nu bëne'e më vidë cubi por pudërë shtë Espíritu Santo. Tsagla'guë guësëdchini Espíritu Santo vidë cubi la'ni ldu'u hia'a të parë gac cambi llgabë shtë hia'a. ⁶Por Jesucristo, Salvador shtë hia'a, Dios bëshe'ldë Espíritu Santo parë cuezënúhi' lë'ë hia'a parë adë gúnëdi'i faltë pudërë ni tubi mumëntë ⁷të parë gáca'a shini më sin culpë lu më. Gaquin por tubi favurë nu por pudërë shtë Jesucristo, Salvador shtë hia'a, nu parë gáca'a shini më nanapë esperansë naná vidë sin fin naguëne'e më.

⁸Ra di'dzë ni na verdá. Rac shtua'a guëni'irú'ul ra enseñansë ni lu ra mënë të parë ra narialdí ldu'i Dios, guëni'i ldu'u rall gunë rall cusë za'quë. Ldai' rë' naza'quin nu napin provëchë parë mënë. ⁹Perë bëlua'a téchil lu di'dzë dishi'bi nu ra cuendë shtë chu guc shtadë guëlú mënë, nu asuntë catë ruadi'dzë mënë chupë tsunë di'dzë con catë nanú mënë nardildi di'dzë pë runë cuntienë ra mandamientë purquë grë di'dzë ni nápëdi'i valurë nu rlluf'idi'in parë bien shtë mieti.

¹⁰El quë narlua'a ldai' falsë nu quëgull divisioni entrë ra shmënë Dios, bë'në corregir lé'ëll chupë u tsunë vultë; si adë rúnëdi'ill cuendë shtí'dzël, bëgú lé'ëll entrë ladi të. ¹¹Nguiu ni bënítill lu shnezë

Jesús. Nápëll duldë nu mizmë lé'ëll nanëll nacondenádëll.

Cunseju parë Tito

¹²Iurë guëdchini Artemas u Tíquico naguëshe'lda ndë, bë'në grë cusë parë gue'dë guënal na guë'dchi Nicópolis purquë rac shtua'a guëquërela guë'dchi ni tiempë naldë. ¹³Bë'në grë cusë të gúnël compaño abogado Zenas nu Apolos parë adë gúnëdi'i faltë parë viajë shtë rai'. ¹⁴Nu zac los de más bëchi sa' hia'a tsasé rai' de

quë runë tucarë gunë rai' lo quë narac shtu'u Dios të parë gapë rai' narqui'ni rai' nu gunë rai' compaño ra nanapë nicidá. Zni gac rall mënë ziquë plantë narne'e nashi za'quë.

Rialú cartë con tubi saludë

¹⁵Grë ra naquëhunë compaño na ndë'ë quëgshe'ldë rai' saludë lul, Tito. Bëdë'ë saludë shtë na'a lu grë ra narac shtu'u Jesús nu ra narac shtu'u lë'ë na'a.

Rac shtua'a gunë të recibir bendición shtë Dios. Amén.